

**Uunga siunnersuut: Nukissiornermi ikummatissat avatangiisinut akitsuutaat pillugu
Inatsisartut inatsisaat**
(Aningaasaqarnermut Naalakkersuisoq)

Akissuteqaat
(Aningaasaqarnermut Naalakkersuisoq)

Aappassaaneerneqarnera

Akileraartarnermut Akitsuusiisarnermullu Ataatsimiititaliap inatsisissatut siunnersuutip sularineqarneranut atatillugu peqqissaartumik sulisimanagera Naalakkersuisut sinnerlugit qujassutigaa.

Nuannaarutigalugu maluginiarpara ataatsimiititaliami amerlanerussuteqartut siunnersuut tapersoraat.

CO₂-mik aniatitsinerup annikillisarneqarnissaanik sulissuteqarnermi tamat peqataasariaqarnerat Naalakkersuisut isumaqataaffigaat, aammalu CO₂-mik aniatitsinerup qanoq iliorluni appartinneqarsinnaanera pillugu umiarsuartigut timmisartutigullu angallanermik ingerlataqartunik pingaarnernik oqaloqateqarnissat Naalakkersuisut aallartinniarpaat.

Aamma maanna aappassaaneerinermi Naalakkersuisut sinnerlugit Nukissiornermi ikummatissat avatangiisinut akitsuutaat pillugu Inatsisartut inatsisaata allannguutissaatut siunnersuummik saqqummiussissaanga. Allannguut avatangiisinut akitsuutip, akitsuutit annertussusissaatut siunnersuutaaqqaartunut sanilliullugu 60 procentimik appartinneqarnissaanik imaqarpoq. Akitsuummik allannguiq akissakinnerusut eqqarsaatigineqarnissaannik kissaateqarnermik tunngaveqarpoq. Taassuma erseqqinnerusumik oqaluuserinissaanut tunngatillugu allannguutissatut siunnersuut tassungalu oqaaseqaatit innersuussutigissavakka.

Taama oqaaseqarlunga siunnersuutip saqqummiunneqartup, Naalakkersuisut allannguutissatut siunnersuutaat maanna aappassaaneerinermi saqqummiunneqartoq ilanngullugu pingajussaanerneqarnissaminut ingerlateqqinneqarnissaa Naalakkersuisut sinnerlugit inassutigissavara.